

दिनांक 23.07.2025
समय: 18.45 बजे
आकाशवाणी जयपुर—अजमेर
प्रादेशिक समाचार

- मुख्यमंत्री भजनलाल शर्मा कह्यो—सरकार प्रदेश मांय पाणी री पूर्ति तैय करण सारू लगातार कोशिश कर रही हैं
- राजस्थान हाईकोर्ट मांय नुवा बनायी ज्या सात जज आज शपथ लीनी—हाईकोर्ट मांय न्यायाधीशां री तादाद 43 व्हीं
- प्रधानमंत्री नरेन्द्र मोदी वां रा ब्रिटेन अर मालदीव रा दौरा ऊं भारत री दुनिया मांय पहुँच अर नीतियां ने मज़बूती मिलण री आस जतायीं
- प्रदेश रा ऊगणी हलका मांय लारला चार दिन री सुस्ती पाछे चौमासा री बिरखा ओजू ज़ोर पकड़्यो— प्रदेश मांय केई ठोडां बिरखां

.....

मुख्यमंत्री भजनलाल शर्मा कह्यो है के सरकार प्रदेश मांय पाणी पूगावणो तैय करण सारू सगळा जरूरी जतन कर रही हैं वे आज चित्तौड़गढ़ कने निम्बाहेड़ा मांय राख्खी ज्यी जनसभा मांय बोल रह्या हां ई मौके श्री शर्मा विकास रा करीब सात सौ करोड़ रुपया रा खर्च वाळा काम जनता ने सूप्यां मुख्यमंत्री कह्यो के सरकार पाणी सारू मध्यप्रदेश सरकार सागे मिल र रामजल सेतु परियोजना रा अर हरियाणा सागे यमुना जल समझौतो कीनो हैं मुख्यमंत्री कह्यो के प्रदेश मांय कठे ई पाणी री कमी नी आवण दी जावेलां

.....

मुख्यमंत्री डोढ़ साल बनाम पांच साल रो जिक्र करता थकां कह्यो के राज्य री लारली सरकार जो काम पांच साल मांय नी कर सकी, वे वां रा राज मांय डोढ़ साल मांय ई कर दिया ज्यां वे निम्बाहेड़ा मांय अहिल्याबाई होल्कर री मूरत रो अनावरण कीनो अर स्मृति पार्क जनता ने सूप्यों श्री शर्मा बीस सरकारी महकमां री जनता रा भला री योजनावां रो दरसाव करण वाळी विकास प्रदर्शनी ई देख्यीं

.....

राजस्थान हाईकोर्ट री मुख्य पीठ जोधपुर मांय आज नुवा बनायी ज्या सात न्यायाधीशां ने शपथ दिरायी ज्यीं मुख्य न्यायाधीश के.आर. श्रीराम वां ने पद अर गोपनीयता री शपथ दिरायीं ई सागे ई अब राजस्थान हाईकोर्ट मांय न्यायाधीशां री तादाद हाल ताई री सब ऊं बत्ती 43 व्हे गयी हैं आज शपथ ले र नुवा बण्या जजां मांय जस्टिस संदीप तनेजा, जस्टिस बलजिंदर सिंह संधू, जस्टिस बिपिन गुप्ता, जस्टिस संजीत पुरोहित, जस्टिस रवि चिरानिया, जस्टिस अनुरूप सिंघी अर जस्टिस संगीता शर्मा शामिल हैं

.....

राज्यपाल हरिभाऊ बागडे कह्यो है के दीक्षांत समारोह विद्यार्थियां री जिन्दगी रो नुवो पाठ व्हे हैं वे आज जोधपुर मांय एम.बी.एम. विश्वविद्यालय रा दीक्षांत समारोह मांय बोल रह्या हां राज्यपाल कह्यो के शिक्षा औपचारिक डिग्री ताई सीमित नीं रहवणी चाहिजे, बल्कि समाज अर देश सारु जिम्मेदारी रो एहसास करावण रो जरियो व्हेवणो चाहिजे

जळसा मांय राज्यपाल स्नातक अर स्नातकोत्तर री डिग्रियां सागे 16 विद्यार्थियां ने सोना रा तमगा दे र नवाजां ई मौके मौजूद उपमुख्यमंत्री डॉ. प्रेमचंद बैरवा कह्यो के तकनीकी शिक्षा व्यक्तिगत विकास सागे सामाजिक अर देश री प्रगति रो जरियो हैं

.....

शिक्षा मंत्री मदन दिलावर प्रदेश ने भणार्ई—लिखाई रा हलका मांय अगाड़ी बणावण रो संकल्प दोहरायो हैं वे आज जयपुर मांय राख्यी ज्या एक गैर सरकारी जळसा मांय बोल रह्या हां वे शिक्षकां ने सम्बोधित करता थकां भणावण रो काम गंभीरता ऊं करण बाबत् कह्यो श्री दिलावर कह्यो के अध्यापकां माथे बच्चां रा भविष्य ने संवारण री खास जिम्मेदारी हैं

.....

देवस्थान मंत्री जोराराम कुमावत आज जयपुर रा दुर्गापुरा रेलवे टेशन ऊं वरिष्ठ नागरिक तीर्थ यात्रा योजना रा तैत रामेश्वरम् अर मदुरई सारु खास रेलगाड़ी रवाना कीनीं इण मांय जयपुर जिला रा साढे पांच सौ अर भरतपुर जिला रा 226 बुजुर्ग शामिल हैं आ रेलगाड़ी जातरूआं ने मदुरई अर रामेश्वरम री तीरथ री ठोडां रा दर्शन करावेलां ई मौके खबरनवीसां सागे बातचीत करता थकां देवस्थान मंत्री कह्यो के ई ए.सी. रेलगाड़ी री सजावट राजस्थानी लोक संस्कृति रे मुजब करी ज्यी हैं

.....

भारत आदिवासी पार्टी रा सांसद राजकुमार रोट आज नई दिल्ली मांय रेल मंत्री अश्विनी वैष्णव सागे मुलाकात कर र वागड़ हलका मांय रेल सुबीता मजबूत बणावण सागे केई मांगां रखीं श्री रोट बांसवाड़ा—डूंगरपुर—रतलाम रेल परियोजना बेगी पूरी करण री अरज ई कीनीं

.....

प्रधानमंत्री नरेन्द्र मोदी कह्यो है के भारत अर ब्रिटेन बीचे रणनीतिक साझेदारी मांय हाल रा बरसां मांय खूब प्रगति व्ही हैं आज ब्रिटेन अर मालदीव रा आधिकारिक दौरा माथे रवाना व्हेवण ऊं पैली दिया ज्या प्रस्थान व्यक्तव्य मांय प्रधानमंत्री आस जताई के वां रा दौरा ऊं भारत री दुनिया मांय पहुंच अर नीतियां ने मजबूती मिलेलां श्री मोदी कह्यो के वे ब्रिटेन रा प्रधानमंत्री कीर स्टारमर सागे भारत—ब्रिटेन मुक्त व्यापार समझौता—एफटीए ने बधावो देवण रा बारा मांय चर्चा करेलां प्रधानमंत्री मोदी कह्यो के वां रो मालदीव रो दौरा भारत री **पड़ौसी पहले** अर **विजुन महासागर** नीतियां रा तैत शांति अर स्थिरता बधावेलां

.....

श्री जगदीप धनखड़ रो उपराष्ट्रपति ओहदा ऊं इस्तीफो राष्ट्रपति कानी ऊं मंजूर कर्यो जावण पाछे चुनाव आयोग ई ओहदा सारु चुनाव री तैयारियां सरु कर दीनी हैं आयोग कानी ऊं आज जारी पानडी रे मुजब उपराष्ट्रपति चुनाव रो कार्यक्रम बेगो ई जारी कर्यो जावेलां आयोग रे मुजब इण ऊं पैली निर्वाचक मंडल री लिस्ट बणावण, चुनाव अर सहायक चुनाव अधिकारी तैय करण अर उपराष्ट्रपति ओहदा सारु पैली व्ह्या सगळा चुनावों ऊं जुड़ी सामग्री भेळी करण अर वां री जाणकारी देवण रो

काम कर्‍यो जावेलां उपराष्ट्रपति रा चुनाव सारू संसद रा दोन्यू सदनां रा सदस्य वोट देवे हैं ध्यानजोग है के स्वास्थ्य कारणां ऊं श्री धनखड सोमवार ने उपराष्ट्रपति ओहदा ऊं इस्तीफो दे दीनो हो जिण ने राष्ट्रपति द्रौपदी मुर्मू मंजूर कर लीनो

.....

जयपुर रा राष्ट्रीय आयुर्वेद संस्थान मांय आज महर्षि चरक जयंती रा कार्यक्रम सारू व्ह्यां छह दिन ताई चालण वाळा आं कार्यक्रम मांय वैद्य अर विद्वान बेहतर स्वास्थ्य रा बारा मांय चर्चा करेलां ई सागे ई नुवी पीढी ने आयुर्वेद रा ज्ञान अर जूना रीति-रिवाज ऊं जोडबा री कोशिश करी जावेलां एनआईए री प्रोफेसर निशा गुप्ता बतायो के उद्घाटन कार्यक्रम मांय विद्यार्थियां सारू श्लोक बोलण री होड़ राखी ज्यो

.....

अलवर जिला रा बीचगांवा मांय आज कावड़ परिक्रमा रे दौरान बिजली रो करंट लाग जावण ऊं दो जणां री मौत व्हे गयी अर कुछ और लोग झुलस ग्या, ज्यां मांय ऊं कुछ री हालत गंभीर हैं ओ हादसो कावड़ियां रा रथ रे बिजली री हाईटेंशन लैण रा तार ऊं अड़ जावण रे कारण आया करंट रे कारण व्ह्यो

.....

प्रदेश रा ऊगणी हलका मांय चार-पांच दिन री सुस्ती पाछे चौमासा री बिरखा ओजू ज़ोर पकड़ लीनो हैं आज बारां अर कोटा मांय झमाझम पाणी बरस्यो लारला चौबीस घंटा मांय सब ऊं बत्ती 14 सेंटीमीटर बिरखा झुंझुनूं जिला रा पिलानी मांय व्हीं अलवर, सवाईमाधोपुर, चित्तौड़गढ़, भरतपुर, डीग, झालावाड़, उदयपुर अर सिरौही मांय ई चोखो मेह बरस्यो ई बीचे केई ठोडां उमस भरी गर्मी रही श्रीगंगानगर मांय अधिकतम तापमान 39 डिग्री सेल्सियस ने पार कर ग्यो आज जयपुर, भरतपुर अर कोटा संभाग रा कुछ हलकां मांय बादळां री गाज सागे तेज अर कठे-कठे भारी बारिश व्हेवण, जदके उदयपुर, अजमेर अर बीकानेर संभाग रा कुछ हलकां मांय हल्की बिरखा रा आसार हैं बंगाल री खाड़ी मांय नुवो कम दबाव रो हलको बणबा ऊं प्रदेश रा ऊगणी हलका मांय कठे-कठे 26 जुलाई ऊं बिरखा तेज व्हेवण अर 26 ऊं 30 जुलाई बीचे भारी बारिश व्हेवण रा आसार हैं

.....

हनुमानगढ़ जिला मांय टी.बी. उन्मूलन कार्यक्रम रा तैत 50 हजार जणां री नॉट जांच पूरी करीजी हैं हनुमानगढ़ आ उपलब्धि हासिल करण वाळो प्रदेश रो पहलो जिला बण ग्यो हैं जिला क्षय रोग अधिकारी डॉ. मुकेश शेखावत बतायो के टी.बी. री शंका वाळा लोगां री पिछाण कर र वां रो तुरत ईलाज कर्‍यो जा रह्यो हैं

.....

हर साल 23 जुलाई ने राष्ट्रीय प्रसारण दिवस मनायो जावे हैं ओ दिन भारत रा रेडियो प्रसारण रा माथो ऊंचो करण वाळा इतिहास ने याद करण रो मौको हैं साल 1927 मांय इंडियन ब्रॉड कास्टिंग कम्पनी-आईबीसी मुंबई ऊं देश रा पहला आधिकारिक रेडियो प्रसारण री सुरुआत कीनी हीं आ नींव आगे चाल र सुणबा वाळा करोडां लोगां री जिन्दगी मांय सूचना, शिक्षा अर मनोरंजन रो नुवो पाठ जोड़्यो साल 1936 मांय इण ने ऑल इंडिया रेडियो रा रूप मांय पुनर्गठित करी ज्यो, जिण ने अब आकाशवाणी रा नाम ऊं पिछाण्यो जावे हैं इण रो मकसद बहुजन हिताय-बहुजन सुखाय ने पूरो करता थकां आकाशवाणी आज दुनिया रा मोटा प्रसारण संगठनां मांय ऊं एक हैं राष्ट्रीय प्रसारण दिवस म्हाने रेडियो रा योगदान ने समझण अर इण रा भविष्य ने और बेहतर बणावण री प्रेरणा देवे हैं

.....

आकाशवाणी ऊं हर महीना प्रसारित कर्‍यो जावण वाळो प्रधानमंत्री नरेन्द्र रो खास कार्यक्रम **मन की बात** ई दफा 27 जुलाई ने व्हेलां आ ई कार्यक्रम री 124वीं कड़ी व्हेलां ई सारू आप ई मुफ्त नम्बर **1800-11-7800** माथे 25 जुलाई ताई राय दे सको हों ई सागे ई **नरेंद्र मोदी एप** अर **माय जीओवी ओपन फोरम** रे जरिए ई राय दी जा सके हैं ओ कार्यक्रम आकाशवाणी अर दूरदर्शन रा पूरा नेटवर्क माथे प्रसारित कर्‍यो जावेलां कार्यक्रम ओटीटी प्लेटफॉर्म वेब्ज माथे ई सुण्यो जा सकेलां

.....